

DE USU

ASTROLABI

55





S

N. VIII. C 19. E. 24.

J. Lee. Huttwell.


from the Sale of the books of the late
James Epps Esq. of HuttwellCat. Martineau [J.] Poblacon


C. 11.

5137/A



2





72813

DE VSV
ASTROLABI

COMPENDIVM, SCHE-
matibus commodissimis illustratum, ac
mendis quamplurimis repurgatum.

Authore Ioanne Martino Poblacion.

Cui accessit Procli Diadochi fabrica, vsusq; Astrolabi,
Georgio Valla Placentino interprete.
Præterea Gregoræ Nicephori Astrolabus, eodem in-
terprete.



LVTETIAE,

*Apud Gulielmum Cauellat, in pingui Gallina,
ex aduerso collegij Cameracensis.*

1557.



Fœlices animæ, quibus hæc cognosce-
re primùm,
Inque domos superas scandere cura
fuit.




GVLIELMVS CAVEL-

lat Lectori Mathematicarum di-

sciplinarum studio

S. P. D.



Emper fui in ea senten-
tia, Lector optime, vt
crediderim Stoicos verè
ac preclarè dixisse ho-
mines hominum causa
genitos esse: atque hinc
parœmiæ locum fuisse

datum ἀνδρῶν πρὸς ἀνδρῶν καὶ δαυμόνιον. Nimirum vt
homo hominem adiuuet, ac de communi socie-
tate, vt non dicam in dies, sed etiam in horas pro
cōcessa mediocritate bene mēveri satagat, in quo,
cū hactenus & vires, & sumptus, ingenium-
que, pro mea tenuitate, vltro impenderim, ces-
sandum non existimaui, donec Dominus, qui
facientes adiuuare solet, consilium hoc pro sua
voluntate, mihi in aliud commutârît. Nemi-
nem esse puto Mathematicarum disciplinarum
cultorem diligentissimum, qui annos abhinc de-

A ij

EPISTOLA.

cem, plus minus nō viderit Arithmeticos, Geometricos, Astronomicos, & Cosmographicos libros quamplurimos, nostra qualicunque industria in lucem prodisse: figuris etiamnum appositè, & graphicè (quoad eius fieri potuit) expressis. Quæstus alit multos, inquit Poëta, sumptus perterritat omnes. Ego vtrunque negligēs aliis potius quàm mihi semper prodesse studui. Cuius rei testimonium de multis in hocce Astrolabi opusculo, tibi candidè exhibeo. in quo ad vnguem elaborando, emaculando, & elegantissimis nitidissimisque figuris illustrando, quantum promouerim, de aliorum exemplarium collatione facile iudicabis. Verum enim vero, coelatum nolim, nec item dissimulatum, hisce Astrolabicarum figurarum demonstrationibus nostris, cum literas, tum lineas & inscriptiones multas inesse quarum vsum (si autoris contextum obseruas) vel nullum, vel fortasse rarum inuenies. Quæ omnia quorsum euadant, menses abhinc paucos disces, vbi annotationum, demonstrationum & exemplorum gratissimam sylvulam, in hunc ipsum authorem à viro quodam erudito concinnatum per me acceperis. Interea labores hosce boni consulito, & foeliciter valeto.



IOANNES MARTINVS

Poblacion Francisco Lu-

peo Rincono

S. P. D.



Nosti, mi Francisce,
quòd dum inter
differendū de cor-
porum cœlestium
theoria astronomi-
ca, obiter Astrolabi
meminissē : nonnulli meorum a-
micorum, quibus plurimum debeo,
assiduè me rogauerunt, vt compen-
dium aliquod vsus illis aperirē. Quod
facilè permisi, Cùmque libelli apud
bibliopolas minimè reperirentur, à
me contenderunt, vt ipse compila-

A iij


EPISTOLA.

rem. Quibus flagitantibus, operam meam denegare non potui: atque eò libentius id feci, quòd & illis obsequi, & tibi consulere sum arbitrat, si summatim dixerò, quæ diffusius poterant pertractari: nec adeò breuitati studuero, vt obscuriora videantur. Quod non modò in hac re, verùm in omni eo quod nobis superest laboris, efficiam. Neque me in hoc còmpendio aliquid excogitasse credas, sed aliorum tantum dicta secutum. Adieci tamen Altimetriæ demonstrationes: quia noui quàm sis harum rerum diligens inquisitor. Vale, & me tuum ama.

Ioan-



IOAN. MARTINI POBLACION DE
vsu Astrolabi Compendium.




*A*strolabi vtilitatem, quibusque vsibus accommo-
 detur, succinctè & ap-
 pertè tractare intendi-
 mus, perstringendo di-
 cta quorundam, ac ali-
 ter digerendo: aliorum
 autē nonnulla refecando: interdum verò quæ-
 dam adiiciendo, quæ eius elucidationi conueni-
 re videntur. A partium igitur instrumenti no-
 minibus, omniumque in eis contentorum expla-
 nationibus ordiemur, ac Arabicis non omnino
 neglectis, Latina, quoad fieri poterit, amplecte-
 mur. Dicitur ergo *Astrolabum*, quasi *astrorum*
ansa vel *manubrium*, & *Astrolabus*, vt *Geor-*
gio Vallæ placet: per eum nanque *astrorum* mo-
 tus examinamus: & *Planisphærium*, quasi

A iij


DE V S V

sphæra in plano exarata. In cuius partibus omnium prima est armilla suspensoria: à qua planisphærium liberè pendet, cui succedit ansa quæ armillam cum Astrolabo connectit.



Tandem sequitur Planisphærium: in quo duæ sunt facies, anterior vna, altera posterior, quæ & dorsum dicitur. Anteriori (quæ & mater à nonnullis nuncupatur) Limbus annectitur in margine, per circuitum diuisus in 360 partes æquas, Aequinoctij gradus à neotericis appellatas: quarum quælibet in 60 scrupula, seu minuta secatur, & quarum singulæ 15, horam efficiunt æqualem.

Lim-



Intra hunc limbum memorata, facies variarum regionum continet tabellas (quæ tympana vocantur à quibusdam) variis terræ plagis inseruientes, ob diuersam poli Finientem, aut Horizontem sublimitatem: Quarum vnaquæque tres habet circulos concentricos: & eorum

minimus, & centro vicinissimus, Cancrī circulus dicitur: quia circulo quem Sol (quum initium Cancrī possidet) latitudo primi mobilis describit, proportionē confertur. Maximus verò, Capricorni: medius autem, circulus Aequinoxiij nominatur. Duas insuper habet diametros, se in circulorum centro secantes: quos in quartas distinguunt. Harumque diametrorum ab armilla descendens linea, mediij coeli dicitur, quia meridiano circulo confertur. Altera verò, Horizon rectus, cuius sinistrum orienti, dextrum occidenti adscribitur, instrumento in conspectu ad os nostrum collocato.

Tympana

ASTROLABI.
Tympana seu tabellæ.

6




E, centrum mundi: a c, linea mediæ cæli: d b, Horizon rectus:
d, Oriens. b, Occidens.

Habet item circulos Arabicè dictos Almi-
cantarath: qui circuli sunt paralleli Finienti to-
tūmq̃ hemisphæriū in coronæ effigiem ad ver-

ticem vsque diducunt: & in solipartiis (hoc
 est vna tantum parte seu gradu distantibus) sunt
 90. In tripartiis 30. In quinque partiis autem
 18: vt in figura sequenti, in decem partiis 9.
 Et quidam incompleti, alij perfecti: quorum
 maximus est Horizon decliuus, & vltimus
 omnium minimus: eoque minor quisque est, quo
 magis à primo (hoc est Finiente) separatur. At-
 que horum centrum punctus verticalis est, à
 quo ad Finientem quaquaersus 90. sunt gra-
 dus. Ad Aequinoctiale autem quantum polus
 supra Horizontē eleuatur, in linea meridiei per
 eosdē circulos computatur, per facile est nosse cui
 regioni tabella deferuiat. Hi circuli astrorum
 eleuationibus aptantur: quare circuli eleuatio-
 num & altitudinum non abs re nominantur,

Almicantarath.




Continet præterea illarū quælibet circulos verticalales: sic ideo dictos, quia se secant in regionis pūcto Verticali qui Arabicè dicitur Zenith. Præfati verò circuli dicuntur Azimutæ, intersecantes almicantarath seu parallellos in 360 partes: à quibus & ipsi pari modo secantur. et ij omnes sunt imperfecti per eosque percipitur in qua mundi plaga, aut hæmisphærij quarta, stella videatur.

DE VSV

Azimuth.

Meridies



Sub Horizonte declini sunt horæ inaequales,
decem arcibus distinctæ, meridiano & finiente
ex v-

ex utraq; parte coassumptis: quæ idcirco 12. sunt,
 quoniam dies artificialis prolixus aut brevis in
 totidem horas diuiditur, quum in eo sex ascen-
 dant signa: itidem & nox, ob eandem causam:
 prima tamē hora ab occidua parte inchoat, duo-
 decimāque terminatur in orientem: in quibus-
 dam lineæ crepusculorum describuntur.

Hore inæquales.



D E V S V

His igitur regionum tabellis seu tympanis incubat Aranea, quæ Signiferum continet, & stellarum fixarum quasdam fulgentiores. Signifer autem, qui & circulus obliquus dicitur, quoniā æquidistantes Aequinoctiali omnes ad inæquales angulos intersecat ut inquit Proclus, in signa 12 distribuitur. Cuius superficies conuexa, seu linea Zodiaci extrema, est Ecliptica. Quodlibet autem Signum 30 partibus dirimitur in solipartiis, aut in 6 in quinquepartiis, aut aliter ut fabricanti libet. In quo quidem Signifero initia Arietis & Libræ ab Aequinoctiali minimè separantur: & quæ intra Aequinoctialem cadunt, Borealia nominantur, reliqua verò Australia: stellæ fixæ, denticulorum extremitatibus designantur.

Aranea.

Aranea.

Supra Araneam in aliquibus instrumentis regula ponitur Ostensor dicta, Arabice *Almuri*, limbū perambulans vniuersum. Est præterea in Aranea foramen, sicut & in cæteris planisphaerij partibus, vt mutuò connectantur.

Ostensor.



Posterior facies Astrolabi.
Sequitur tandem posterior Astrolabi facies,


B

dorsum appellata: quæ (viti tabellæ seu tympana) quatuor quartis distinguitur, à duabus diametris se in centro dissepcentibus. Eadem namque sunt cum illis dimetientibus, quæ opposita parte in tympanis figurantur. Et harum descendens linea, mediæ cœli, altera Verò, Finiēs vniuersaliter nominatur. In ea itē sunt circuli concentrici, partes seu gradus eleuationum à finiente ad verticem & ad terræ angulum continentes: ac zodiaci signis etiam adaptantur. Sunt quoque alij circuli eccentrici, in nonnullis concentrici, in quibus dies, anni, mensium nomina, numerusque dierum inscribuntur. Intra hos supra dimetientem transversam, horarum lineæ sunt in nonnullis instrumentis, vtrarumque, æqualium scilicet, & inæqualium. In inferiore parte Quadrans est: in quo duæ sunt altimetrix scale, in 12 æquas partes diuisæ: quæ puncta dicuntur aut digiti.

Dorsum Astrolabi.

Est etiam mediclinium, quod Arabicè *Ali-dada* Græcè *dioptra* nuncupatur: in cuius medio linea recta est per centrum acta, linea fiduciæ appellata. & eius extremis pinnulæ insiguntur: in quibus foramina sunt astrorum eleuationibus deferuientia.

D E V S V
Alidada seu dioptra.



*Ultimò est clauus, qui & axis dicitur Astro-
labi, foramen ingrediens tympanorum, & retis,
simùlque connectens: in quo similiter foramen
est, stabulum dictum, quod clauus subintrat, qui
dicitur equus omnia firmans ac perstringens.*

Foramen. Clauus.




*His breuiter prælibatis, ad rem accedamus,
initium à Sole sumentes.*

Prima

ASTROLABI.

Prima propositio.



Olis partem indagare per Astrolabum.

Cum Signiferi partem in qua Sol est, per hoc instrumentū nosse cupis: in eius posteriori facie seu in dorso quere diem in circulo dierum: cui linea fiduciæ superposita, partem quæsitam indicabit in Signifero statim supra diem: ac in aduersa parte locus Soli oppositus collocatur, qui Arabicè dicitur nadir solis. Et hæc duo loca notabis in Araneæ Zodiaco ad horarum inuestigationē: Ut in sequentibus patebit. In anno tamē bissextili dicta pars diei antecedenti adiudicabitur post Februarium. Si autem per gradum seu partē Solis diem scire desideras, inuerso procedas ordine: linea præfata, parti superposita diem ostendet.

Secunda propositio


Sublimitatem Solis quauis hora venari.

Quantum sol supra Finientem attollatur, verticalis circulus seu azimuth nobis insinuat, sub quo tūc Sol reperitur, cognita eius à parallelis sectione. Eam igitur hoc pacto cognosces. Astro-

labo (vt decet) liberè pendēte, mediclinium sursum deorsum de circumagas, quoad Solis radius pinnae Soli obiecta penetrans foramē in alterius pinnae foramē inciderit: ac sub linea fiduciae partē notabis: quæ sit meridiana necne, vel antemeridiana aut pomeridiana, facile discēs si sequentia notaueris. Vt meridiem in regione quauis dignoscere possis, planam superficiē marmoris aut tabulae, Horizontis seu Finientis superficiē æquidistantem situa: in qua circulum describas: & in eius cetro gnomonem, seu stylum acutum semidiametro circuli minorem perpendiculariter erigas: & ante meridiem (cum terminus umbræ peripheriam contingit) signa contactum: itidem post meridiem. Deinde à priori contactu ad alterum duc lineam: quam bifariam disspescas: & à signo medio ad centrum & peripheriā, alteram agas lineam, quæ vtrinq; ad peripheriam acta, meridiano proportionē confertur, cui cum umbra coniungitur nusquam ab ea declinans, meridies est: & cum eam nondum attigerit, ante meridiem: cum verò præterierit, post meridiem: & dimetiens huic perpendicularis Horizonti proportionē collata, orientis veri necnon occidentis locum ostendit. Quare præfatæ dimetientes, quatuor mundi plagas verè distinguunt.

Meri-

Meridies.



CD, gnomon. A, contactus ante meridiem. B, post meridiem.

At si memorati instrumenti copia desit, visq; per astrolabū id nosse: hoc modo absolues. Partē Solis in Signifero per præcedentē inquiras: quam in Aranea signa requapiā: ac in linea meridiei colloca: & quotam in almicantarath, seu circulis parallelis partem occupet, inspicias, à Finiente

B iij

D E V S V

fursum versus cōputando. Quæ si eleuationi prius inuētæ fuerit æqualis, erit meridiana: sin minus, antemeridiana, aut pomeridiana: & hoc distingues pauculo temporis interiecto spacio, rursus eleuationem per dorsum capiendo: quæ si fuerit priore maior, erat antemeridiana: quoniam Sol tendit in meridianum: pomeridiana verò, si minor: à meridiano quippe declinat in occiduum tendens. Sed si posthabito gradu Solis, meridianam per Astrolabū percipere cupis eleuationē: sæpius obseruanda est, ac seorsum notanda, quandiu Sol ascendit, quoad declinare videatur: maxima enim est meridiana: & hic modus est Nicephori in initio expositionis Astrolabi. Simili modo cuiusque stellæ quæres ac distingues sublimitatem eam per vtrunque dioptræ inspiciendo foramen.

Tertia propositio.

Solis, aut stellæ fixæ, præfatam sublimitatem inter circulos Finienti parallelus, seu almicantharath, quauis hora collocare.

Quæ sita per præcedentem eleuatione Solis, vel stellæ ad tuæ considerationis tempus: quære simile in parallelis dictis, à Finiēte inchoādo (qui omnium primus & maximus est, ac imperfectus) ex parte orientis, si ante meridiem, aut cœli me-

li medium, ex parte Verò occidentis, si post meridiem seu coeli medium, comperiatur, versus lineam mediæ coeli scandendo: eamque attramento signa aut quavis materia in tympano seu tabella tuæ regionis: & in quo parallelo numerus elevationis finitur, Araneam circūagendo, partem Solis, vel Stellam statue. Si autem numerus elevationis ad parallelum aliquem non terminetur, quin potius ad duorum intervallum parallelorum, id intervallum proportionaliter dirimas, hoc modo. Partem Solis in initio intervalli, hoc est priori duorum parallelorum, siste: aut stellam cuius elevationem accepisti: cui ostensorem adiungas: & si tuum instrumentū ostensore careat: Vtarris mediclinio dorsi, loco ostensoris: ac nota contactum in partibus limbi. Rursus Araneam agas, quoad pars Solis, aut stella finem intervalli contingat: & superposita linea fiduciæ, nota similiter limbi contactum: & limbi partes duabus notis interceptas, per partes dubias, quibus scilicet elevatio tua, integra superat intervalla, multiplica, productumq; per intervalli partire valorem: & numerus quotus, pars est rationalis quaesita, quā de partibus inter duas notas cadentibus sumas, illiq; ostensorem aut lineam fiduciæ adnectas: & circūagas Araneam, ut pars Solis, vel stella sub linea fiduciæ cadat: habebisq; ex amf-

sim optatum. Et hic modus est etiā Nicephori in quinta propositione expositionis Astrolabi. Eius tamē operandi ratio sumitur ex vicesima propositione. 9. Elemen. Eucl. Vt omnia pateant, exemplo opus est. Volo igitur in Astrolabo quinq; partito, 18 scilicet parallelorū, vbi quodlibet intervallū est 5 partiū, astri sublimitatē inter parallelos collocare: per præcedentem accipio illud (exempli gratia) à Finiente exortiuo 28 partibus attolli ex parte orientis integra capio 5 intervalla, 25 Valentia partes: at quia 3 supersunt, & eleuatio cadit ad sextū intervallū inter sextum ac septimū parallelū, astrum in initio intervalli sisto, hoc est in sexto parallelo: & acta per astrū linea fiducia, noto in limbo partē contactus, similiter in fine seu septimo parallelo, & inter duas notas (verbi gratia) 10 limbi partes cōperiantur: has multiplico per 3 dubias, & 30 coalescunt, quas per 5 resoluo, & redeunt 6 in numero quotiente: ea est portio rationalis, quam de partibus his, adiungā intervallis integris: in cuius fine statuā lineam fiducia, seu dioptram, cui astrum subiiciā: & habebo quæsitum.

Quarta propositio.

Partem Solis per meridianam eleuationem distinguere.

Solis

Solis in meridie sublimitatem quere per secundam huius: eam in linea meridiei inter parallelos per præcedentem nota: & Araneã circumagas quoad linea eclipticæ notam attingat: & si una tantum pars eclipticæ illam cõtigerit, ea est pars Solis, initium scilicet Cancræ, aut Capricorni. Si autem duæ partes æqualiter distantes à Tropicis, notã attingant quæ æquas habent in meridie sublimitates, æquos insuper arcus diurnos & nocturnos: una est pars Solis: vtra verò sit, mensis enucleabit.

Quinta propositio

Horam æqualem per Astrolabum interdiu captare.

Veram partem Solis per primam inuentã, inter parallelos, per tertiã constitue, à finiente exortiuo, si sit ante meridiẽ: aut ab occiduo, si post meridiẽ, aut in linea mediij cœli, si meridies sit: quod per secundam elicies: & parti solis ostensorẽ, vel lineã fiduciæ adiungas: & in limbo ostendet horam æquale, à linea mediæ noctis inchoando: à qua ad lineam meridiei duodecim æquales horæ numerantur, cuilibet horæ quindecim gradus assignando: & hoc si ante meridiem vel meridies fuerit: si verò post meridiem, ab eadem linea

D E V S V

*meridiei numerū inchoabis. Et si vltra comple-
tas horas aliqua portio comperiatur, cuiuslibet par-
ti quatuor horæ scrupula, seu minuta tribuemus:
vt si vltra septimam horam sint quatuor limbi
partes, erunt 16 horæ minuta.*

Sexta propositio.

*Idem noctu per stellam aliquam tibi no-
tam perscrutari.*

*Stellæ alicuius in Aranea descriptæ, nocturna
sublimitate per secundam cognita, & inter or-
bes parallelos per tertiam statuta, in parte solis
inuenta per primam, ostensore constituas: &
horam indicabit æqualem in limbo: vt in præ-
cedente notasti.*

Septima propositio.

*Solis ortum & occasum quocunque tem-
pore dignoscere.*

*Habitam Solis partē, in Finiente exortiuo si-
tua: & ostensore per dictam Solis partē agas:
qui in limbo horam, & horæ partē insinuabit,
qua Sol supra finientem exortiuum emergit. Eo-
dem modo occasum venaberis, Solis parte in oc-
ciduo Finiente collocata. Arcus autē ab ortu ad
occasum, est diurnus, seu dies artificialis: qui per
duo-*

duodecim diuisus, horam dabit inaequalem diurnam. Reliquum verò, est arcus nocturnus, ab occasu scilicet ad ortum: qui similiter diuisus per duodecim, inaequalis horæ nocturnæ quantitatem ostendet.

Octaua propositio.

Vespertini crepusculi finem, matutiniue initium percipere.

Alicuius stellæ tibi notæ, & in Aranea descriptæ eleuationem inquires, per secundā: quam inter parallelos per tertiā figes: & si pars Solis lineam crepusculi occidui contigerit, finis est crepusculi vespertini: si autem lineam crepusculi matutini attigerit, est eius initium. Acto igitur ostensore per partem Solis, horam & horæ partem dicto citius apprehendes. Si tamen lineæ crepusculorum minimè describantur in tympano tuæ regionis: partem Soli aduersam (quæ nadir Solis à neotericis appellatur) aduertito: quæ cum 18 partibus limbi consurgit ab ortu, finis est crepusculi vespertini. Cum verò totidem ab occasu distat, eò tendens, initium est matutini.

Nonā propositio.

Quot horæ fluxerint à Solis ortu, aut eius occasu, promere.

D E V S V

Horam interdum per quintam inuestigato: ac per septimā tempus ortus: quod à tēpore tuæ considerationis demito: reliquū ergo fluxit à Solis ortu. Idem noctu per Solis occasum facito. Aut aliter, si libet, hoc idem inquiras: ac in idem redibit. Solis sublimitatem ad tuæ inspectionis tēpus per secundā inuenito, & inter parallelos per tertiam concinnato, adiunctoque ostensore contactū in limbo signa: deinde reducito, Solis partem in Finientē exortiuū simul cum ostensore, notata, vt prius, limbi parte. Demū duabus notis interceptum arcū per 15 (hoc est vnius horæ spatium) partire & habebis horas æquales. Si quæ partes residuæ fuerint, per 4 multiplica: erūtque horæ scrupula seu minuta: nocte verò per Finientem occiduū idem venabere.

Decima propositio.

Horam inæqualem diurno quouis momento designare.

Partem Solis inter parallelos per iam sæpe repetita figito, & nadir eius, hoc est pars aduersa horā ostendet inæquale in lineis horarum temporalium sub Finiente seu Horizonte descriptis, quarum initium ab occidente sumitur. Quæ si lineam cōtingat aliquam, est hora inæqualis completa,

pleta, si secus, incompleta. Quantum autem illius horæ incōpletæ fluxerit, hoc modo accipies. Primò per partem Soli aduersam ostensorē agas, & locum in limbo nota. Deinde, ad horæ initium reuocato partem cum ostensore, & locum in limbo signa, itidem in fine horæ. Quam igitur rationem habet interceptū spatium inter primā & secundam notam, ad interceptum duabus vltimis: eam habet id quod fluxū est illius horæ, ad ipsam horam, vt si vltra quinq; horas inæquales sint sex limbi partes inter primam & secundam notam, scilicet initij horæ fluentis, ab initio autem ad finem seu vltimam notam octodecim partes reperiuntur in limbo: quarū 6 sunt tertia pars, dicam tertiam horæ partem esse fluxam vltra 5 horas. & hoc ponitur à Nicephoro in fine quartæ propositionis expositionis Astrolabi.

Vndecima propositio.

Noctu idem absolvere.

Alicuius stellæ notæ sublimitatē querito: & in parte eleuationis (vti per Solē interdiu docuit præcedens) concinnato: & gradus Solis horam declarabit inæqualem, & horæ partē, si opus fuerit: velut in horis diurnis est declaratum. Nec te

lateat horam inaequalem esse duodecimam partem diei artificialis seu noctis: & cum dies naturalis ex die artificiali & eius nocte coalescat, quantumcunque dies noctesque sint inaequales, semper tamen hora inaequalis diurna cum hora inaequali nocturna duabus horis aequalibus diei naturalis aequantur.

Duodecima propositio.

Horas aequales in inaequales reducere aut contra.

Aequales horas reducendas in partes seu gradus conuertas, pro quaque hora 15 partes sumendo. Si qua verò sint horæ minuta, pro singulis quatuor partem vnā adnumerato: totūq; partire per quantitatem horæ inaequalis, quam per septimam inquirito: siquid autem supersit diuidendum per 60 multiplicato, & per dictam quantitatem diuidito, & erunt minuta, horæ temporali seu inaequali iungenda. In verso ordine feceris in conuersione horarum inaequalium ad horas aequales: multiplicato scilicet numerum horarum inaequalium per quantitatem horæ inaequalis, & per 15 partire, si quid superfuerit, per 60 multiplica, & rursus per dictam quantitatem diuide: habebisque horas aequales, & minuta illis adiicienda.

Deci-

Decimatertia propositio.

Horas æquales aut inæquales per dorsum Astrolabi explicare.

Miridianam Solis eleuationem per secundam reperiās: & ubi mediclinium horæ duodecimæ linea cōtigerit, perspicias: contactumque in linea fiduciæ quauis materia signes. Id autē signum bi duo aut triduo subseruiet. Sole igitur terram illustrante, hora tuæ considerationis, eius eleuationē speculari in quarta horarum: necnō ubi signum prænotatum mediclinij ceciderit: quod horā offerret æqualem, si lineæ dorsi horarū sint æqualiū: aut inæqualem, si inæqualiū: vel vtramq; si vtrarūque lineæ illic designentur. At si meridiei altitudinem ignores, partem Solis per primā exactē cognitā, in linea mediij cœli fige, & eius sublimitatem perpende in orbibus parallelis. Deinceps in simili dorsi eleuatione mediclinium statue, ac vt dictum est operare, notando scilicet contactum dioptræ seu lineæ fiduciæ, & lineæ horæ duodecimæ, &c.

Decima quarta propositio.

Arcum diurnum vel nocturnum cuiusuis stellæ in aranea signatæ elicere.

Per arcum diurnum stellæ, tempus intelligimus quo fertur supra Finiētem, aut arcū in limbo ab oriente in occasum illi tempori proportionem collatum: stellam ergo retis cuius arcum inquiris, in Finiente exortiuo constitue, per quam illic manentem ostensore agas, & nota limbi partem, à qua ad lineam mediæ noctis est arcus seminocturnus illius stellæ, si autē dupletur, coalescit arcus nocturnus, quo à toto limbo, aut à 360 partibus sublato, diurnus arcus supererit, cuius subduplum, est arcus semidiurnus.

Decimaquinta propositio.

Quo tempore stella fixa oriatur, enucleare.

Stella in Horizonte posita, parti seu gradui Solis ostensore adiungas, & horam ac horæ partē intelliges. In eius occasu similiter operare, & cœli mediatione.

Decimasexta propositio.

Declinationem cuiusque partis Significari, ac cuiusvis stellæ scire.

Partem zodiaci, cuius declinationem scire desideras aut stellam fixam in linea mediæ cœli ponito, & in parallelis, seu almicantharum partes ab Aequinoctiali numerato ad stellam vel partem

tem memoratam, ea enim est declinatio quaesita, quæ si intra Aequinoctialem versus centrum Astrolabi fuerit, declinatio est Borealis. si Verò extra, dicitur Australis: in ipso autem Aequinoctiali nulla est.

Decima septima propositio.

Quatuor coeli angulos, qui & centra dicuntur, & cardines, aperire.

Solis altitudinem Speculeris hora tuæ considerationis, quam concinna inter parallelos persæpe memoratas secundam & tertiam, & partes Signiferi contingentes meridianum & horizontem, quatuor sunt anguli seu centra quaesita. Pars enim circuli obliqui in Horizonte exortiuo, angulus est orientis, & centrum atque ascendens & horoscopus appellatur, & pars illi aduersa, angulus occidentis, pars autem lineam medij coeli contingens supra Horizontem, angulus medij coeli, & pars illi opposita, angulus terræ nominatur. Eodem prorsus modo noctu per stellam aliquam tibi notam operabere.

Decima octaua propositio.

Partem zodiaci cum qua stella oritur, exquirere.

Stella in primo parallelo vel Horizonte con-

stituta, partem signiferi emergentem speculari:
ea enim est quam quæris. Similiter in occasu, &
coeli mediatione efficies.

Decimanona propositio.

Zenith ortus et occasus Solis, stellarumve
fixarum secernere.

Per Zenith in proposito distantiam intelligimus
in linea Horizontis ab Aequinoctiali seu orien-
te vero. Quare aduertendum Finientem, vel Ho-
rizontem, vel primum parallelum, seu primum
almicantarath (quæ omnia idem significant) qua-
tuor distingui quartis, ob Aequinoctiali scilicet
& meridiano: prima namque est ab æquinoctia
li ex parte orientis ad meridianum usque; pergens
in Austrum: quare orientalis Australis dicitur. Se-
cunda vero à meridie ad æquinoctialem ex parte
occidentis, occidentalis Australis appellata. Inde
tertia est occidentalis Borealis ad lineam usque
mediæ noctis. Ultima vero quæ & orientalis Bo-
realis dicitur, à fine tertiæ ad initium primæ tedit,
finiturque. Hæ enim quartæ distinguuntur in partes
à circulis verticalibus Arabicè dictis azimuthh.
Partem igitur Solis, vel stellam fixam in oriente situa,
vel Finiente exortiuo: & ubi Sol vel stella con-
tingat Horizontem, nota, & ab eo loco ad Aequi-

quinoctialē partes per circulos verticales examina & habebis quæsitum. Et si ab Aquinoctiali meridiem versus deuiet, distantia est Australis. Si verò ad lineam mediæ noctis, est Borealis: in ipso tamen Aequinoctiali est in oriente vero. Itidem in occasu dicendum.

Vicesima propositio.

Zenith Solis, stellarumq; fixarum inuenire.

Zenith Solis & stellæ, est eius distantia ab initio quartæ. Solis ergo vel stellæ quæras eleuationem per secundam, quam inter parallelos digeras, ut decet, & azimuth seu circulus verticalis quem attigerit, Zenith illius manifestabit, hoc est distantiam ab initio quartæ.

Vigesima prima propositio.

Quatuor mundi plagas per Astrolabum exprimere.

Zenith Solis per precedentem examina, ac in simili eleuatione dioptram seu lineam fiduciæ in dorso constitue in ea quarta quâ Sol tunc lustrat, fac deinde ut Astrolabus superficiei Horizōtis æquidistet, quæ vltro citroque vertas, quoad umbræ substructillorum, seu paxillorū, aut pinnularum mediclinij, suis incidat lateribus nullibi de-

clinantes, ac fiant æquidistātes, quartāq; Astrolabi, quartæ Solis obiciatur, Vt exigit opus: & duæ dimetientes dorſi, quatuor mundi partes indicabunt. Hoc idem & facilius per ea quæ in ſecunda proſitione dicta ſunt, abſolues, ſi linea meridiei Astrolabi ſuperponatur linea meridiei in circulo deſcriptæ.

Viceſimaſecunda proſitio.

Stellam quamuis in Aranea ſignatam facere notam.

Quo tempore ea oriatur ſtella, cuius notitiam habere vis, per decimamquintam elicias: & quæ tunc oritur, eſt quam quæris. Vel ſic, Cognito, Vt dictum eſt per decimamquintam, ortu illius ſtellæ, itidem Zenith ortus eius per decimam quartam, & per præcedentem inſtrumento ad quatuor mundi plagas debite concinnato, dioptrā vel lineā fiduciæ præfato Zenith ortus adnecte, et ſtella quā per Vtrūque mediclinij foramē intueris tēpore ortus eius, eſt quæſita. Idē, eodēque modo per occaſum eius efficies, ſi libet.

Viceſimatertia proſitio.

Omnes ſtellas Astrolabi vna cognita, in cœlo determinare.

Stellæ

Stellæ iam tibi nocte sereno tempore sublimitatem attendas, & in parallelis apte cõponas persæpe repetitas secundam & tertiam: ac cæterarum singulas speculari, quam habeat vnaquæq; eleuationem in parallelis, simul & Zenith eius, hoc est distantia ab initio quartæ. Deinde in tanta dorsileuatiõne dioptra constituta, quantam habet stella quam aucuparis, ad eam quartam partem dirigas. Astrolabum immoto mediclinio, quam per Araneam ac Verticales circulos didicisti, & quæ per dioptræ foramina lucidior apparet, est ea quam petis. Quod si feceris sigillatim, cunctæ patebunt.

Vicesimaquarta propositio.

Solis à puncto vetticali tuæ regionis remotionem excerpte.

Meridianam altitudinem per secundam inueni, à 90 deme, & relinquetur distantia quesita.

Vicesimaquinta propositio.

Cuiusque loci decidere latitudinem.

Regionis latitudo est distantia puncti verticalis ab Aequinoctiali, quæ poli eleuationi supra Finientem æquatur. Si igitur loci cuiuspiam latitu-

dinē vis interdiu nosse, perfacile est Sole intran-
 te initium Arietis aut Libræ in ipso meridie, quod
 raro euenit, aut prope meridiem, quod sæpiusculè
 fit: meridiei namque eleuatione à 90 subtracta, su-
 pere est latitudo regionis. Et hic modus inuestigan-
 di latitudinē, est Nicephori in secunda propositio-
 ne expositionis. Astrolabi. Si verò Sol declinatio-
 nem habeat tēpore meridiano, illā discutias per
 decimā sextā: quam, si borealis fuerit, ab vniuer-
 sa in meridie eleuatione subtrahere: at si australis
 fuerit declinatio, dictæ meridiei sublimitati ad-
 de: prouenietq; eleuatio. Aequinoctialis supra fi-
 nientē: qua, à 90 detracta, relinquitur altitudo
 loci. Si per stellam fixam aliquam ortū & occa-
 sum habentem, hoc idem noctu scire vis, eo pa-
 cto venaberis, vt de Sole dictum est. Per stellam
 autem non occidentem latitudo cognoscitur, ele-
 uationem maximam & minimam aggregando
 ac sumendo dimidium totius aggregati, id enim
 tua est latitudo.

Vicesima sexta propositio.

Duorum locorū explorare longitudinem.

Longitudo regionis est distātia eius à meridia-
 no insularum Fortunatarū, vt Ptolemæus inquit,
 in libro de situ orbis. Duarum autem vrbium seu
 loco-

locorum longitudo, est suorum inuicē meridianorum interstitiū, hoc est æquinoctialis arcus, duobus illarum vrbium seu locorū meridianis interceptus. Si igitur duorum locorum longitudo in tabellis regionum inscripta reperiatur, facillimum est eorum longitudinem excerpere, minorē à maiore subtrahēdo. At si alterius tantum scribitur, futuri deliquij lunaris cuiuspiam, initio in eo loco perspicuē scito, in loco ignotæ longitudinis, deliquij eiusdem initium obserua per Astrolabū. & si tempora conueniant, eandem habent longitudinem illa loca seu distantia ab oriente & occidente. Si contrā, varia est eorū ab occidente separatio. Et cuius tempus initij maius est, eius longitudo maior erit, vel orienti propior. Dempto igitur minori tempore à maiore, quod reliquū est, longitudo illorum in horis dicitur & minutis aut minutis solum. Cuilibet ergo horæ quindécim partes seu gradus assignabis, quatuor verò minutis partem vnam, cuilibet minuto horæ, quindécim minuta partis seu gradus, habebisque longitudinem in partibus & scrupulis, aut scrupulis tantum. Quòd si neutrius loci longitudo in tabulis reperitur, duplici obseruatione ad initium deliquij eiusdem, erit vtendum. A duobus ergo sociis simul consideratio fiat, ab vno quidem in vno locorum, ab altero autem in altero, ac tem-

pora conferantur, ut expositum est.

Vicesima septima propositio.

Duarum ciuitatum longitudine ac latitudine differentium distantiam enodare.

Vtriusque latitudinem, per vicesimam quintem perconteris, & minorem à maiore demas: residuum erit differentia latitudinis illarum Urbium, quã seorsum notabis: differentia autem longitudinis per præcedentẽ rimeris, aut dictã, si maioris, per tabulas longitudinũ & latitudinum regionum inquiras: Vtranque deinceps in se ductam quadratè in vnum coniunge, ac totius aggregati quære radicem quadratam: ea est linea diagonalis in gradibus & minutis cœli, aut minutis tantum, & distantia, quam habere cupiebas.

Vicesima octaua propositio.

Ascensiones Signorum, aut cuiusvis arcus Signiferi in Sphæra recta patefacere.

Ascensio signi, aut arcus alicuius Zodiaci, est arcus Aequinoctialis ei coascendens, vel
tem-

tempus quod est ab initio ad finem ortus talis Signi, vel arcus. Finem igitur Signi, vel arcus, in Horizonte recto constitue, ac initio eius ostensorem applica: & partes limbi inter Horizontem rectum, & lineam fiducie, vel ostensorem, sunt ascensio signi vel arcus: hoc autem siue in oriente fiat, siue in occidente, aut linea mediæ cœli minimè refert: propterea quòd ascensiones & descensiones, cœlique mediationes æquantur in sphaera recta.

Vicesimanona propositio.

Ascensionem rectam vniuscuiusque partis Eclipticæ, vel stellæ fixæ in Aranea signatæ definire.

Sella aut parte Eclipticæ (de cuius ascensione dubitas) in Horizonte recto posita, ostensorem per initium Arietis agas, partem in limbo notando quam signat ostensor, arcus autem à præfato Horizonte recto ad locum in limbo notatum est ascensio recta partis, vel stellæ. Circa descensionem exerceberis simili modo.

D E V S V
Tricesima propositio.

Ascensionem quamque Signi, vel arcus
Eclipticæ in Sphæra decliui referare.

*Initium Signi, vel arcus, Finienti exortiuo in
tympano tue regionis adiunge, ostensore super-
inducto: partemque in limbo norando, impelle
rursus Araneam cum ostensore, quoad uniuersus
arcus emergat: ac partem in limbo sub ostensore
signa: nam spatium limbi duabus notis in-
terceptum, est illius arcus ascensio.*


Tricesima prima propositio.

Duodecim domorum cœli ad horam sta-
tutam initia stabilire.

*Quatuor centra seu cardines per decimam se-
ptimā concinnentur in primis: dein horoscopus,
vel partem ascendentem in octauam horam in-
equalem age: & pars Zodiaci in angulo terræ
existens, initium constituatur domus secundæ:
eiusque pars aduersa, initium octauæ. Rursum,
eandem partem ascendentē in horam decimam
age: & gradum anguli terræ, tertiæ domus ini-
tium statue: & partem ei oppositam, initium
nonæ.*

nonæ. Præterea, partem occidentem (horoscopo scilicet aduersam, quæ angulus dicitur occidentis) in horâ agas, 2, inæquale: & pars similiter anguli terræ inchoabit domum: & quæ ei est è regione, 11. Dictam demum partem occidentem in 4 agas horam: & pars in angulo terræ inuenta, 6 domus initium erit: eiusque pars aduersa domum 12 insinuabit: & hic modus est Nicephori in 4 propositione suæ expositionis Astrolabi. Aliter etiam quæ dicta sunt, absolui queunt: estque modus vulgaris. Cognitis (vt dictum est) quatuor cardinibus cœli, ostensorem parti ascendenti adiungas, contactum in limbo notando: & arcum ab illa nota ad lineam meridiei trifariam seca: & in termino primæ portionis ostensore posito gradum zodiaci ostensori subiectum, 12 domus initium statue: in fine similiter 2 partis, 11 domus reperies initium. Eodem prorsus modo à linea meridiei ad notam in limbo captâ ex parte occidentis arcum (vt in oriente fecisti) in 3 æquas diuide partes, & in fine primæ, nonæ domus initium stabilias: in fine autem secundæ, initium octauæ: quarum oppositæ in similibus partibus Signorum oppositorum, è regione collocantur. Illud tamen minime prætereundū censeo, vniuersum cœli ambitū in 12 partes esse diuisum quæ domicilia nominantur: quarum 4, centra

vocantur, & anguli, vel cardines: ut dictum
 est in 16. in quibus assignandis omnes conue-
 niunt, in reliquarum distributione dissident. Bo-
 na enim parte Astronomi (antiqui præsertim)
 cælum hoc pacto diuidunt. Circulum quendam,
 Meridianum in polis mundi secantem, & Ho-
 rizontem in ascendente & angulo occidentis
 machinantur: partemque Aequinoctialis duo-
 bus illis circulis interceptam, ab oriente in me-
 ridiem tripartiuntur: itidem de qualibet cate-
 rarum facientes, perque sectiones illas circulos
 transmittunt secantes se in polis mundi, qui mo-
 do præexposito cælum distinguunt: cui, domo-
 rum præfata figuratio subseruit. Alij autem
 volunt quòd Aequatoris quartæ Horizonte
 ac Meridiano interceptæ, in treis æquas por-
 tiones diuidantur: per quas circuli traseuntes,
 se secant in punctis sectionum Meridiani &
 Horizontis: coassumptisque Meridiano &
 Horizonte, duodecim cæli interstitia coales-
 cant. Et secundum hunc modum Stofflerinus
 Astrolabo domorum lineas inscribere docet,
 ut patet in hac figura.



Tricesima secunda propositio.

Aspectus planetarum proiectionesque
radiatorum prospicere.

*Huius rei enodatio completa, sermonem exigit
longiorem, prolixiorēque, quā huic compen-
dio sit expediens. At ne sicco (ut ita dixerim)*

pede ista transcurram, paucula perstringam. Primum quidem triuiale est, planetarum aspectus si propriè & stricto vocabulo sumantur, quatuor esse: hexagonum dico, tetragonum, trigonum, et diametrum. Si verò largè quinque: coitio nāque illis annumeratur. Horum autem hexagonus, tetragonus, & trigonus, bifariā capiuntur, antè scilicet, & retro (vt Iulius Firmicus ait 2. libro suæ Matheseos, capite 25) hoc est secundum ordinem aut successionē signorum vel contrā. Exempli gratia, primæ partis Arietis dexter aspectus trigonus, est prima pars Sagittarij: sinister v. prima Leonis: simili modo in alijs: quare si Lunā Venus præcedit 60 partibus distans. Lunæ ad Venerē est sinister aspectus, Veneris autem ad Lunam dexter. Has verò partes nonnulli sumunt de partibus Zodiaci, quæ dicuntur æquales: & hoc modo capi debere asserit Abraham à Benex-re, & non alio: dicitque se infinities expertum, & ita reperisse. Alij asseuerant esse capiendas in Aequinoctiali secundum ascensiones circuli directi, adducti auctoritate Ptolemæi, verbo 60 sui centiloquij: vbi inquit criticorum dierum quartas esse loca Lunæ in angulis quadrati conclusi à circulo directo: & Hali in commento. Alij autē medium tenere volunt, dicentes quòd dum planeta est in medio cœli, aut in angulo ter-
ra,

rae, proiectio radiorum capi debet secundum ascensiones circuli directi cum vero in ascendente vel occasu, secundum ascensiones regionis: at mediis in locis, mixtim. Quorum notitiam vberiore ex quarta differētia Alchabicij quæras, capite de Athazir, id est, de directione. Si radiationes igitur, vel aspectus planetae in Zodiaco volueris perscrutari, facillimum est, ipsius Zodiaci partibus cōputatis: ad hexagonum sinistrū 60 partibus antè: hoc est secundū ordinem Signorum: ut si planeta in prima fuerit Arietis parte, prima sexagena numerentur ad partem Signi Geminorum: ad hexagonum verò dextrum retro totidem: ut ab eadem prima Arietis parte, ad Aquarij primam: ad tetragonum autem, 90, antè & retro: & ad trigonum 120 antè & retro simili modo. At hos aspectus examinare iuxta secundum, vel tertium modum haud facile est, secundum tertium præsertim: maiorique indiget introductione: quare consultò prætereo.

D



Tricesimatertia propositio,

Gradum ascendentem, vel horoscopum
reolutionis annorum mundi statuere.

*Vt plenius omnia capiantur, termini explicen-
tur. Reuolutio annorum mundi, introitus Solis
in initium Arietis. Reuolutio autem cuiusq; rei
(Vt*

(*ut geniturae, vel ædificij*) est reditus Solis ad eum locum in quo erat in initio eius: qui quidem reditus fit in anno solari. Annus autē (*ut Ptolemaeus inquit 3 libro suæ magnæ cōstructionis, capite primo,*) ex 365 diebus naturalibus coalescit, & quarta diei, demptis 12 secundis diei, quæ in 300 annis diem efficiunt vnum. Dies in super naturalis, est completa firmamenti aut Aequinoctialis reuolutio, cum tanta parte Zodiaci quantam Sol motu proprio interea peragit. Quæ quidem portio, si secundum medium motum capiatur, diem efficit naturalem medium: si autem secundum verum Solis motum, diem naturalem constituit verum: quo fit ut in anno solari sint 366 reuolutiones Aequinoctiali integræ, & vna quarta ferè. Reperire igitur gradum, seu partem ascendentem Zodiaci cum termino huius portionis cum Sol intrat primum punctum Arietis est inuenire partem ascendentem, vel horoscopum reuolutionis annorum mundi. Inuenire autem partem ascendentem cum Sol intrat punctum vbi erat in initio alicuius rei, est partem ascendentem reuolutionis illius rei comperire. Aduertendum præterea, quod in inquisitione huius partis, habenda est certa noticia motus Solis, & partis Zodiaci ascendentis alicuius anni in reuolutionibus annorum mundi,

aut initij rei in reuolutione eius: cui tanquam
radici est inherendum in præfatis reuolutio-
nibus: vt exempli gratia, in annorum mundi
reuolutione callere decet tempus introitus Solis
in initium Arietis in horis & minutis hora-
rum, & partem tunc ascendentem in aliquo an-
no, à quo deinceps computatio fiat. In reuolutio-
ne verò genitura, nosse oportet verum locum
Solis in illa genitura, & horoscopus eius: &
hoc nobis erit loco radicis. Cuius rei canon à
Stofflerino decenti compendio scribitur: idcirco
subscribendum curavi, cum eius tabella huic
negocio deferuiente.

Numerus	annorum.	Gradus	Minuta	Numerus	annorum.	Gradus	Minuta.
1		87	19	16		317	3
2		174	38	17		44	22
3		261	57	18		131	41
4		349	16	19		219	0
5		76	35	20		306	19
6		163	54	40		252	37
7		251	12	60		198	56
8		338	31	80		145	15
9		65	50	100		91	33
10		153	9	200		183	6
11		240	28	300		274	40
12		327	47	400		6	13
13		55	6	500		97	46
14		142	25	600		189	19
15		229	44	700		280	52

Quum igitur quolibet anno scire volueris gradum reuolutionis annorum mundi, id est, ascendens tempore introitus Solis in Arietem, addisce primum introitum Solis in Arietē aliquo anno tibi noto verificatum sub certo numero dierum, horarum, minutorum, & secundorum, quantum

D iij

possibile est, & id tempus introitus Solis in A-
 rietem, appellabis radicem. Deinde horas &
 minuta (vt offolet) recense in limbo Astrola-
 bi diligentius quo potes & fini iunge Almuri
 seu ostensorem, & locum eius in margine signa.
 Præterea, considera annum incarnationis ad
 quem cupis scire huiusmodi gradum reuolutio-
 nis, & subtrahe numerum annorum incarna-
 tionis radice tanquam minorem, à numero an-
 norum propositorum, tanquam à maiori: &
 residuum numerabit tibi annos interceptos annis
 radice & annis tue considerationis. Est enim
 huiusmodi residuum, quantitas annorum qui
 sunt à tempore radice, vsque ad illum annum
 cuius ascendens quæris. Pro quolibet ergo anno
 residui, moue Almuri à loco in limbo signato per
 87 gradus & viginti ferme minuta gradus:
 quo factò applica principium Arietis Almuri se-
 cundum omnem præcisionem: & gradus retis qui ce-
 ciderit super Horizontem obliquum orientalem,
 erit ascendens anni propositi, & dicitur gradus
 reuolutionis annorum mundi. Quo cognito per
 decimam septimam & tricesimam primam hu-
 ius, facile poteris æquare omnes 12 domos, &
 constituere figuram reuolutionis anni propositi,
 per quam anni status indicatur. Verum cum
 non-

nonnunquam anni residui sint multi, laboriosum
& tediosum, ac difficile esset, toties per 87
gradus & viginti minuta Almuri mouere, à lo-
co in limbo signato: ideo ordinauimus tabellam
hic annexam per quam huiusmodi negotium
facile absoluitur, hoc pacto: Numerum anno-
rum residui qui numerantur ab anno radice vs-
que in annum considerationis, quare in linea
prima numeri annorum lateris sinistri tabellæ:
& in directo versus dextram offendes gradus
& minuta, quibus à loco limbi signato numera-
tis, & termino numerationis Almuri & prin-
cipio Arietis applicatis, videbis in Horizonte
exortiuo gradum ascendentem, vt supra. Quod
si annos residui non præcise in linea prima nu-
meri annorum inueneris, intra duplici introitu,
quemadmodum pro medijs planetarum motibus
supputandis agere consueuimus: & si facta ad-
ditione graduum & minutorum per duplicem
introitum inuentorum numerus graduum in 360
gradus, aut ultra euaserit, reuice 360, & resi-
duum serua: cum quo residuo age, vt iam supra
exposuimus: & habebis propositum, scilicet
gradum ascendentem anni propositi, (quem
gradum reuolutionis annorum mundi appella-
mus) & ex consequutione 12 coeli domicilia.

Haëtenus ex Stofflerino . Eodem prorsus modo reperies gradum seu partē ascendentem reuolutionis cuiusque rei , si cū parte in qua Sol erat in initio eius, simili modo feceris vti fecisti cum initio Arietis in reuolutionibus annorum mundi , præterquam quòd Sole distante à principiis Arietis, aut Libræ , in initio illius rei si multi prætereant anni , non seruiet ea radix : sed debet noua quæri per tabulas motus Solis, quia si huic radici longo tempore innitereris , posses hallucinari: quod prope Aequinoëtia minimè fit: quinimo eadem radix multis seruit temporibus.

Tracta-

TRACTATUS SE-
cundus.


*H*ætenus de vsu Astro-
labi, quantum ad eius v-
tranque faciem attinet:
demptis altimetris scali
dorso inscriptis: de qua-
rum vtilitate superest
nonnulla perstringere.

Hæ nãque scalæ, turrium, ac rerum ad pendicu-
lum in Horizontis superficie erectarum, plano-
rumque, & profundorum mensuris accommo-
dantur. Quare aduertendum, in dorso Astrola-
bi sub dimetiente quæ Horizonti proportionem
confertur duas describi scalas, quæ vmbre di-
cuntur: vnã quidem lineæ mediæ noctis æ-
quidistantem, quæ vmbra seu scala versa dicitur:
alteram verò, quæ ab hac ad lineam tendit me-
diæ noctis perpendiculariter, quæ vmbra seu sca-
la extensa nominatur, aut recta. Nonnulli ta-
men versam appellant quam hîc extensam di-
ximus nominari. Rectam verò eam, quam ver-
sam nominauimus: vt Georgius Valla 6 Geo-
me. cap. 3. Sed siue hoc, siue illo modo dican-
tur, discrimen est nullum, modò re ipsa nulla sit
differentia. Harum scalarum vtraque, in partes

12 æquas diuiditur: quæ puncta Vmbra dicuntur seu digiti. Vmbra namque extensa, Vmbra rei perpendicularis superficiei Horizontis proportionē confertur. Vmbra autem versa, Vmbra rei superficiei Horizontis æquidistanti, veluti gnomonis parieti infixi perpendiculariter, aut styli cylindri. Linea mediclinij locum habet lineæ visualis, hoc est ab oculo ad rei cacumen terminatæ, seu radij solaris, rei verticē tangentis, & ipsius Vmbra terminantis. Qui quamuis diuisibilis sit secundum omnem dimensionem, cum sit radius naturalis, quia tamen omnes lineæ longitudinis vtrunque in eo sumptæ, æquidistantes sunt à media mathematica in eo imaginabili, de radio illo tāquam de linea mathematica in mensuris capiendis, loqui licebit. Linea item mediæ nocti, à scala Vmbrae extensæ ad centrum Astrolabi procedens rei mensurandæ proportionē confertur, & status dicitur.

Aduertendum præterea, turris altitudinem, seu cuiusque rei, inquirei posse per Vmbra, seu radios Solis, vel per lineam visualem rectam absque Vmbra, aut per lineam reflexam à re polita, velut à speculo. Hos ergo modos prosequemur, propositionum demonstrationes inferendo.

Prima



Prima propositio.




Vrris aut rei alterius altitudinem quanta sit, per vmbra cognoscere.

Si per radios solares turris altitudinē in plano cui patet accessus, nosse vis, per secundam primi

D E V S V

huius, eleuationem Solis observa. Quæ si fuerit
45 partium, tunc vmbra metiaris, & turris
altitudinem percipies: est enim turri æqualis. In
omni nanque eleuatione Solis per semiquartam
circuli verticalis, linea mediclinij cadit in finem
scale extensæ: efficiturque linea diagonalis qua
drati: & vmbra rerum, rebus ipsis æquantur:
quod sic ostenditur.




Sit turris $a c$, Umbra $b c$, radius $b a$, in elevatione Solis quadraginta quinque partium: dico Umbrae spatium, scilicet $b c$, in plano, æquari altitudini turris $a c$: altitudo namque $a c$, super Umbra $b c$, est perpendicularis, ut supponitur: efficitur ergo triangulum $a b c$, rectangulum: cuius angulus $b c a$, rectus est. Quum autem Sol per hypothese in 45 partibus eleuetur, per semiquartam scilicet circuli magni: erit per ultimam sexti Elemen. angulus $a b c$, dimidium anguli recti, quandoquidem toti quartæ angulus rectus correspondet. Ergo per tricesimam secundam primi, reliquus angulus $c a b$, est recti dimidium, æqualisque angulo $a b c$. Quum igitur anguli qui ad basim $a b$, sint æquales, erit per sextam primi latus $c b$, æquale lateri $c a$, hoc est Umbra ipsi altitudini: quod erat probandum. Et de hoc loquens Ptolemæus 2 parte magnæ constructionis, capite 6 (quum ponit 15 parallelum) inquit Umbra equalitatis illic esse 60 partes: hoc est, habitantibus sub 15, parallelo distanti ab Aequinoctiali 45 partibus ferme, Umbra equalitatis, id est Solis existentis sub Aequinoctiali in meridie, est 60 partium: hoc est, æqualis suo gnomoni: supponit enim gnomonem, seu stylum horarium esse æqualem semidiametro sui circuli: & quod tota diameter sit 120 partium.

Secunda propositio.

Eandem altitudinem per lineam visua-
lem perquirere.

Si autem Umbra, Solisque radiis prætermiſſis, dictam altitudinem ſcire deſideras, in plano libero, ſic facito. Mediclinium in dicta eleuatione 45 partiũ ſtatue: & tandiu à radice turris in plano ſecedas, quoad per Vtrumque dioptræ foramen, turris faſtigium intuearis. Deinde ſpatium intercoceptum inter te & turrim metire: cui adde ſtaturæ tuæ quantitatem: & habebis turris altitudinem. & eo modo quo in præcedente, oſtendere potes: præterquam quod hîc additur ſtatura: quia perpendicularis linea ab oculo ad turrim, eſt Horizonti æquidiſtans, per viceſimam nonam primi Elemen. Eucl. quæ turri æquatur, ab eius contactu ad cacumen: Vt oſtenſum eſt in præcedente: à contactu autem ad Horizonta, per triceſimam tertiam primi, æquatur ſtaturæ: patet ergo propoſitum.

Tertia




Tertia propositio.

Eandem item altitudinem sine Astrolabo propalare.

Si verò Astrolabo careas, & per aliquem modū prædicta nosse cupis: in spatio plano hoc pacto absolues. Cape duas regulas, quarū vna ad alterā dupla sit: quæ cōiungantur æquidistāter per aliam tertiam regulā minori æqualē, ad angulos rectos cū tertia dicta: quas sic cōnexas vtro citroque agas, donec oculo supra minorem posito, per

D E V S V

*Summitatem alterius, turris cacumen specularis:
deinceps, à termino minoris, ad radicem vsq; tur-
ris metiaris, proueniétque altitudo eius, addendo
quantitatem regulæ minoris: quod sic deducitur.
Sit nanque turris a b, spatiū b c indefinitæ quan-*



*titatis: regula d e, dupla ad regulam f g. quæ con-
iunctæ per tertiam d f, perpendicularares illi consti-
tuantur*


tuantur super lineā bc , ita quòd df , linea tertiæ regulæ, fiat pars lineæ bc : talitérq; situentur in dicta lineā bc , vltro citróque agēdo, quoad per summitatem d , oculū in g , turris cacumen perspiciat. Dico bf , addita quantitate regulæ fg , æquari altitudini turris, à pūcto enim g , per tricesimā primā primi, ducatur æquidistans ad bc , quæ per vicesimā nonā primi erit ad a , perpendicularis secetque eā in pūcto i : secabit de , per tricesimā tertiam in medio, vt in pūcto h : erit ergo per eandem & per præmissa hg , æqualis he : & ig , æqualis bf , cū igitur he , per vicesimā nonā primi, sit, æquidistans a : erūt per eandē duo triangula a, i, g , & h, g, e , æquiangula. ergo per quartā sexti, latera æquis angulis sebtēsa, rationalia sūt. Quare sicut hg , ad gi : ita he , ad ia : et permutatim per decimā sextā quinti, sicut hg , ad he , ita gi , & ei æqualis bf , ad ia : sed hg , est æqualis he , igitur bf æquatur ia : & ib , per tricesimā tertiam primi, est æqualis fg : tota ergo ab , æquatur bf , et fg , quātitati scilicet à regula minore ad turri, addita quantitate minori regulæ æquali: quod erat probandū.

Quarta propositio.

Eandem altitudinem per radium à speculo reflexum perspicere.

E

Quòd si per speculum scire vis, in Horizontis superficie illud constitue: ac ab eo tantum secede, quantum supra terram oculus eleuatur: qua quidem distantia inter te & speculum inuariata manente, tandiu moueatur recedendo, aut accedendo, quoad turris cacumem intuearis in eo: tantum inquam à te distante, quantum oculus attollitur supra finientis superficiem. Dein à speculo metire spatium ad turrim, & habebis altitudinem eius: id autem sic ostenditur.



Si namque turris a b, speculum c, centrū oculi e, spatium verò inter te & speculū c d, æquale d e, scilicet distantia à centro oculi ad Horizontis superficiem: reflectaturque radius a c, à puncto speculi

culi c ad centrum oculi e , dico interstitium bc ,
 æuari turri a b . Nam angulus reflectionis ecd ,
 æqualis est angulo incidentiæ acb , per decimam
 quinti perspectivæ Vitellionis, & duodecimam
 necnon decimātertiam eiusdem, ac per sextam
 secundæ partis Perspectivæ cōmunis. Angulus
 autem qui ad b , in triangulo abc , est æqualis
 angulo qui ad d , in triangulo edc , cum e d , sit
 perpendicularis lineæ db , sicut & ab . Ergo re-
 liquus qui ad a , reliquo qui ad e , erit æqualis: la-
 tera etiam æqualis angulis subtensa, rationalia,
 per quartam sexti. Ergo sicut dc , ad cb , sic de ,
 ad ba , & permutatim dc , ad de , sicut cb , ad
 ba , sed dc , æquatur de , per hypothesim, ergo c
 b , ba . quod erat probandum.


Quinta propositio.

Cuiuslibet rei altitudinem in quavis e-
 leuatione Solis quadraginta quinque parti-
 bus maiore, venari.

Si ergo Sole altius 45 partibus subleuato, per ra-
 dios eius prædictam altitudinē inquirere cupis:
 suspenso Astrolabo liberè, ita mediclinium con-
 cinna, ut solaris radius foramina penetret, tūc li-
 nea fiduciæ vmbra secabit extēsam: quia rebus
 sunt vmbre minores. Nota igitur puncta tacta:
 & in qua ratione se habent ad 12, hoc est totam
 scalā, in ea se habet vmbra turris, ad totā turrim:

E ij

Ut si Sol eleuetur 57 partibus, linea fiducia cōtin-
get octauū ferē scale pūctū, vbi sunt duæ tertiæ
totius scale. Vmbra ergo turris, erit, duæ tertiæ
altitudinis turris, quod sic deducetur. Quoniā in
eleuatione 45 partium (vt per primam huius se-
cundi tractatus patuit, cū vmbra scilicet est æ-
qualis turri) linea fiducia secat finē scale, imagi-
nemur initio scale extensæ (quæ sit b c) gnomo-
nem illi æqualē (qui sit a b) perpendiculariter e-
rēctum in dorso Astrolabi: talitērque Soli oppo-
natur, quod vmbra cadat supra scalem.



In elevatione ignis 45 partium, ut dictum est, umbra gnomonis erit equalis toti scale, in elevatione autem maiori erit minor, si (ut in prefata elevatione 57 graduum) umbra gnomonis terminetur ad signum d, quod sit octavus digitus scale: tunc sicut tota scala supra quam cadit umbra ad umbram elevationis 45 partium, sic pars scale, hoc est puncta tacta, ad umbram d, elevationis 57 partium, quis utrobique est pars equalitatis. Ergo permutatim per decimam sextam quinti, sicut tota scala ad puncta tacta, sic umbra elevationis 45 graduum ad umbram b, elevationis 57 partium. Quare & conuersim, sicut puncta tacta ad scale, sic umbra b d, elevationis 57 partium, ad umbram elevationis 45, & ad gnomonem in equalem. Sed qualis est ratio huius gnomonis ad suam umbram, talis est cuiuslibet altitudinis perpendicularis superficiei Horizontis ad suam umbram in quavis elevatione Solis. Ergo, sicut puncta tacta ad uniuersam scale, hoc est 12 sic umbra elevationis 57 partium, ad ipsam turrim, quod fuit probandum. Metire igitur umbram, & multiplicare per 12, productumque diuide per puncta tacta, scilicet octo & redibit altitudo turris, per vice septuaginta noni, & vice simam septimi Elementi. Euclidis. Sunt enim tres numeri noti, primus videlicet 8 puncta tacta, secundus, uniuersa scale, id est 12, tertius au-


tem Vmbre mensura, queritur quartus ignotus, altitudo scilicet turris: qui eā habeat rationē ad tertiū, quam secundus ad primum. Per regulam igitur abaci, seu Gebræ quæ de tribus dicitur, & per iam dicta, ac per decimam octauam Arithmetices Iordani, quod ex secundo in tertium fit, & quale est ei quod ex primo in quartum: vnde fit, vt toties quartus contineatur in tali producto, quot sunt vnitates in primo: & si per primum diuidatur illud productum, quartus proueniet: quod prius dicebatur.

Sexta propositio.

Eandem altitudinem per lineam visua-
lem in distantia minore altitudine turris,
manifestam reddere.

Si per lineam visuale id vis efficere, suspende
Astrolabū & per dioptræ foramina, turris sum-
mitatem contēplare ac spatiū interceptum inter
te & radicē turris, mensura: quod per 12 multi-
plica, et productū per puncta tacta Vmbre ex-
tensæ diuide: et numero quotienti adde staturam
tuam, hoc est distantia à centro visus ad superfi-
ciem Horizontis: et proueniet altitudo quæsita:
quod ostenditur. Sit turris a b, linea radici turris
perpendicularis b c, minor altitudine turris: sta-
tura

tura verò e d. Dico, sicut puncta tacta se habent ad omnia puncta, scilicet 12: sic linea b c, ad turrim, dempta statura memorata. Ducatur namque à cētro visus d, ad a b, perpendicularis, quam secet in puncto e. erit per vicesimam nonam primi Element. e d, æquidistans b c, & per tricesimam tertiam æqualis ei: & e b, pars turris æqualis c d stature dictæ. Per præcedentem autem, e d ad e a, sicut puncta tacta ad omnia




puncta. ergo b c ei æqualis, ad e a, hoc est turrim, statura dempta, sicut puncta tacta ad omnia puncta. Quare per præcedentem, toties turris

(statura dempta) continetur in eo quod fit ex ductu vmbrae per 12, quot sunt vnitates in punctis tactis: diuiso igitur tali producto per puncta tacta, redibit quantitas turris addita quotienti statura: quod erat ostendendum.

Septima propositio.

Hoc idem sine Astrolabo discutere.

Si in distantia minore altitudine idem nosse cupis, cum Astrolabi copia desit, sic operaberis.



Accipies duas regulas æquales, aut inæquales (nihil refert) quæ erigentur perpendiculariter in linea superficiei Horizontis ad radicem turris perpendiculari, ita tamen vt inuicem separen-

tur

tur Vtunque: & oculo posito in aliqua parte distantioris à turri, per summitem propioris, fastigium turris specularis: vel per aliam quamvis eius partem, modò ea notetur, sitque à terra eleuatio quàm sit centrum visus. Ab ea nota ad visum, linea ducta protendatur, donec concurrat cum linea bc , vt in puncto c , à quo ad turrim metire: & duc per quantitatem regulæ propioris, à nota scilicet per quam turris cacumen inspexisti, ad superficiem Horizontis: productumque diuide per distantiam à puncto c , ad punctum d , regulæ præfatæ propioris: & proueniet altitudo turris. Deducitur autem sic. Sit turris ab , linea radici turris perpendicularis bc , indefinitæ quantitatis: regula autem turri propior de , remotior autem gfh , perpendiculares lineæ bc . A puncto f , regulæ gfh , per summitem de , vel aliam eius partem, eleuationem tamen f , intueatur oculus verticem turris a , producaturs linea à puncto e , ad f , quoad cum linea bc , concurrat: concurret enim per 4, petitionem primi Element. sit, gratia exempli, concursus in c . Dico, si bc , spatium scilicet à puncto c , ad turrim, per de , quantitatem regulæ propioris à nota ad superficiem Horizontis ducatur, & productum diuidatur per dc , spatium scilicet ac , ad memoratam regulam: turris alti-


tudo redibit. Est enim $d e$, per 29 primi æquidistans $a b$, cùm vtraque sit perpendicularis $b c$, per hypothesim, secâtq; reliqua duo latera trianguli $a b c$. ergo per e eandam, duo triangula $a b c$, $d e c$, sunt æquiangula: & per 4 sexti, sicut $c d$, ad $d e$, sic $c b$, ad $b a$. Ergo per iam dicta in præcedenti propositione, quod fit ex ductu $d e$ secundi, in $c b$ tertium æquum est ei ex ductu $d c$ primi, in $b a$, quartum.

Diuiso igitur producto ex $d e$, in $c b$, per $d c$ primum, proueniet $b a$ quartum, quantitas scilicet turris: quod erat probandum.

Octaua propositio.

Turris, aut rei alterius sublimitatem scire per lineam reflexam à speculo à turri separato per minorem distantiam, quàm sit altitudo turris.

Sint




Sint omnia disposita vt in quarta, præterquam quòd distantia c, ab ipsa turri, sit minor altitudine turris: et distàtia oculi à superficie Horizōtis, sit inæqualis distàtiæ inter te et speculũ: tunc per ea quæ illic dicta sunt, sicut d c, ad d e: sic c b, ad b a. Ergo quod sit ex ductu d e, in c b, si diuidatur per c d, proueniet turris altitudo: quare &c.

Nona propositio.

Sole minoris eleuationis 45 partibus existente quantum iu plano accessibili, turris attollatur, ostendere.

Eodem prorsus modo est procedendum quando Sol eleuatur paucioribus 45 partibus (cum Vmbra maiores sunt gnomonibus) quo in eleuatione maiori (cum Vmbra sunt minores) præterquam quòd in eleuatione maiori dioptra secabat Vmbra[m] extensam: in minori verò versam secabit. Quare in maiori eleuatione Vmbra multiplicanda est per duodecim, & productum diuidendum per puncta tacta. At in minori, Vmbra ducenda est per puncta tacta, & diuidenda per 12. quia in tali, sicut 12, ad puncta tacta se habent, sic Vmbra ad gnomonem. Aut si vis reducere puncta Vmbra[rum] versæ, ad puncta Vmbra[rum] extensæ, & cum illis operari vt in eleuatione maiori, scilicet ducendo Vmbra[m] per 12, & diuidendo per puncta tacta, poteris hoc modo. Diuide 144 per puncta Vmbra[rum] versæ, & productum est Vmbra extensa, hoc est quantitas scalæ extensæ. Nam si scala, seu Vmbra extensa protenderetur, tantam eius partem mediclinium abscinderet in ea minori eleuatione. Quod sic deducitur.

Sit



Sit umbra extensa bc , umbra versa cd : cuius portionē c e (puta 6 puncta) mediclinium in aliqua elevatione minore 45 partibus secat, extēdatur linea bc , quoad contingat mediclinium (continget enim, cum non æquidistet illi, per quartam petitionem primi elementi) sit ut contingat in puncto f : dico lineam bf , esse puncta tacta umbræ extensæ: quæ se habebunt ad bc scalā extensam, sicut scala, seu umbra versa, ad eius puncta tacta. Quod si umbra turris multiplicetur per 12, & diuidatur per puncta umbræ extensæ, proueniet idē quod ex multiplicatione umbræ turris per puncta tacta umbræ seu scalæ versæ, & diuisione per 12. Perficio nāque quadratum $abcd$, in quo a , sit centrum Astrolabi: bc , scala extensa: cd , scala versa: ab , linea mediæ noctis, quæ status dicitur: et rei mensurādæ proportionē conferatur: signum e , in scala versa, ubi mediclinium

contingit illam in tali eleuatione: et bc , scala extensa dioptram attingat in f , quum per vigesimam nonam primi Elementi, efficiantur duo triangula equiangula, abf , cef : & per quartam sexti sæpe memoratam, bf , se habet ad cf , sicut ab , ad ce : ergo, sicut cd , scala versa (quæ equalis est ab , per præmissa) ad ce , puncta eius, sed cd , est dupla ad ce , ergo bf , ad cf , quare & ad bc , scalam extensam, quod erat primum. Cum igitur umbra ad turrim per primam et quintam, sicut puncta tacta umbræ extensæ ad scalam extensam, scilicet 12, & hæc per præmissa, sicut scala versa ad puncta tacta umbræ versæ: ergo per vigesimam quinti, umbra ad turrim sicut scala versa ad puncta tacta. Constituantur ergo tres numeri, scilicet puncta extensa, primus: scala, hoc est 12, secundus: umbra turris, tertius: & ducatur tertius, scilicet umbra turris, per secundum, puta 12: diuidaturque productum per primum, puncta videlicet extensa: proueniet altitudo turris per sæpius memorata. Rursus, tres ordinentur numeri: primus, scala vniuersa, scilicet 12: secundus, puncta umbræ versæ tacta: tertius, umbra turris, ducendo scilicet turris umbram per secundam, hoc est puncta umbræ versæ tacta, & diuidendo productum per primum, scilicet 12, proueniet etiam turris altitudo: quod erat


erat secundū. Vt in exēplo, sit in vmbra rei decem pedū, pūcta vmbre verse 6 per quæ ducitur vmbra, productū erit 60 pedes, diuidatur per 12, redibūt quinq; pedes, quāritas scilicet rei. Simili modo, si vmbra dicta decē pedum ducatur per scalam, scilicet 12, proueniet 120 pedes, productūque diuidatur per pūcta extēsa, quæ sunt dupla ad scalā, hoc est 24. redibunt similiter quinq; pedes altitudinis rei. Perea igitur quæ dicta sunt, in quauis distantia plani accessibilis, altitudo capiētur, ac vt in præcedentibus deducetur.

Decima propositio.

Turris aut rei alterius altitudinem in plano inaccessiblei venari.

Si altitudinem cuiusque rei capere vis plano inaccessiblei existente, in plano propinquiore eius summitatem speculari per Astrolabum, vt te docuere præcedentes propositiones, sic tamen, vt linea fiducia secet scalam versam (quod plurimum fit) & nota quota pars pūcta tacta sint numeri duodenarij, hoc est totius scale, & denominatorem scribe, aut nota, vt memineris eius, quum pūcta erunt 6, quæ sunt dimidium scale, scribe 2. vel diuide 12 per

puncta tacta: & numerũ quotũ serua, quod redibit in idẽ: quo factõ, recede quoad perspecta (vt prius) turris summitate, mediclinium altiũ eleuetur vno vel pluribus punctis, vt 2, exẽpli gratia, ita quòd secet scalam in quatuor punctis. Simili modo nota quota pars sint totius scale: & denominatorem serua, qui est 3: à quo priore subtrahẽ, & residuũ est 1: metire deinde spatium duabus stationibus interceptum, quod per id residuum diuide, & habebis turris altitudinẽ, statu-




ra addita, quod facile deducitur. Nã cũ mediclinium secat vmbra versam, sicut puncta tacta se ha-

se habent ad scalam versam, sic turris (dēpta statura tua) ad spatiū inter te & turrim, per precedentem, adiutorio sextæ. Si ergo, ut in prima statione, puncta vmbre sint 6, quæ sunt sub duplum totius scalæ, ergo residuū turris, à statura tua, sub duplum est ad spatium inter pedes & turrim. In secūda verò statione, puncta sint 4, quæ sunt sub triplum totius scalæ, turris igitur residuum, à statura tua, est subtriplum ad idem spatium. Cum autem spatiū prius bis contineat illud residuū turris à statura tua, posterius verò spatiū ter, fit ut à posteriore, scilicet triplo dempto priore, hoc est duplo, maneat simplex, scilicet æquale residuo turris à statura tua: cui spatio, si addatur statura, turris altitudini æquabitur.

Vndecima propositio.

Turris, aut rei alterius, supra montem sitæ, altitudinem in valle contemplari.

Si turris in cacumine montis existentis altitudinem capere vis, dum tu scis in ima valle, turris ac montis simul altitudinem examina, per precedentem, rursus montis tantū, ad radicem usque turris, minorémque à maiore subtrahe, & residuum est altitudo quæsita.



Duodecima propositio.


Plani accessibilis metiri longitudinem.

Planorum tractus in longum latúmque, eo pacto disquires, quo in sublimibus te docuere præcedentia, modo in his per sublimitatē tibi notam (distantiā scilicet ab oculo ad terræ superficiem) plani longitudinem ac latitudinē aucuperis, quomodo in illis per plani dimensionem tibi certam, ad ignotæ sublimitatis notitiam devenisti. Nam
filon-

si longitudo plani mensurandi, distantia ab oculo ad terræ superficiem æqualis sit, dioptra seu linea fiduciæ, erit quadrati linea diagonalis, cadetque in fine scalæ extensæ. Si verò minor, secabit eā. At si maior vmbra versam abscindet, quod frequenter euenit. Quare, sicut tunc puncta scalæ versæ tacta, ad vniuersam scalam se habent, sic distantia ab oculo vsque ad Horizontis superficiē, ad ipsius plani longitudinē inspectam, vel latitudinem. Vtriusque enim mensura capitur eodem modo. Si tu igitur in turri stans, vel alibi, subiecti plani vis habere mensuram, Astro labo suspensio (vt decet) & oculo in exteriori turris superficie constituto, medicliniūque concinnato, vt plani terminū ad turrim terminari specularis per vtrunque dioptræ foramen, si medicliniū in ea speculatione fiat, linea diagonalis quadrati (hoc est, sit in fine scalæ extensæ) distantia ab oculo ad radicem turris æquatur longitudini plani. Si autem abscindat vmbra extensam, præfata distantia maior est plano mensurando, ac se habet ad illud, vt scala vniuersa ad puncta tacta. Quare scala dicta, primus numerus constitutur, puncta tacta, secundus, distantia ab oculo ad Horizontis superficiē, tertius, duc secundum per tertium, vel tertium per secundum (scilicet hanc distantiam per puncta tacta) & productum di-

uide per primum (hoc est scalam, vel 12) redibit mensura plani per sæpius memorata. Sed si mediclinium secet umbram versam, præfata oculi distantia minor est plano mensurando, & se habet ad illud, ut puncta tacta umbræ versæ, ad scalam, hoc est ad 12. Puncta igitur tacta, primus numerus statuatur, secundus scala, tertius distantia ab oculo ad terram, qua per secundum (scilicet scalam vniuersam, vel 12) ducta ac producta per puncta tacta resoluta, plani quantitas redibit. Horum verò ostensiones, ut in præcedentibus assignari possunt. Idem enim in his ac in illis. At planum ad turrim minimè terminatum, metieris facile, si distantioris termini, vel illius plani, primò capias mensuram ad turrim usque, per præcedentia, rursus ad propiorem eius terminum, seu initium, minus à maiore subtrahendo, uti decima te docuit. Eodem prorsus modo per tui ipsius staturam operabere, cum eris in plano veluti de turri dictum est. Quæ omnia intelligi debent plano regulari & æquali existente, quod si fuerit inæquale, ad æqualitatem reducatur, per lineam horizontis superficiiei æquidistantem, cum qua procedendum erit.

In al-



In altis verò & profundis mensurandis, idem omnino quod in planis euenit, eodémque modo proceditur, præterquam quòd in altis & profundis, latitudo est qua venamur altitudinem seu putei, seu alterius rei similis, in planis verò altitudo, qua longitudinis & latitudinis examen perscrutamur.



PROCLI DIADOCHI

Platonici Philosophi, de fabrica vsûque
Astrolabi opusculum : Georgio Valla
Placentino interprete.



*V*m ad Lunæ observationes, necnon
stellarum hærentium coelo, vtile in-
strumentum procudi docuerit Pto-
lemæus, libro quinto magnæ con-
structionis mathematicæ: nos quoque septem or-
bium Astrolabum putamus causa exponen-
dum, eius planè fabricam vsûmque tradendo,
quam apertissimè fieri à nobis poterit. Differt
itaque Meteoroscopium ab Astrolabo huiusmo-
di, quatenus illo hæc quoq; possis augurari, quæ-
cunque per ipsum queas, & plura alia quæ ad
Astronomiam capeffendam vtilia sunt: id quæ
orbium multitudine quibus illud excedit. No-
uem siquidem extruitur orbibus, & maiore do-
ctrina comparatur. At, ad prædictas observa-
tiones cōmodè hic quoque suffragatur Astrola-
bus: quæ is quoq; mōstrauit, binos primū orbes
constituēdo, qui æquales habeāt diametros, facit
vtrūque quadratū. Est verò quadratus orbis, qui
in quatuor æquales diuisus est superficies: vnam
quidem extra conuexam, alteram verò intra
cauum: sed duas parallelas has contingentes,

per quas est circuli profunditas. Hos nimirum
 orbes connectit, ut sese ad angulos rectos ad in-
 uicem secant. Hoc faciunt quando descripto or-
 be circa commune punctum, æqualis circumfe-
 rentiæ circa commune punctum angulos subten-
 derint. Expedit sanè ipsos ita concinnare, vnius
 quidem cauam secando superficiem in dimidio
 profunditatis, alterius autem conuexam, itidem
 etiam sectionum distantias in longitudinem æ-
 quales efficere, ita ut sibi accommodatæ, sese in
 uicem perfricent, in vnâque fiant superficie la-
 bia sectionũ extrorsus introrsusque: necnon hu-
 iusmodi absoluantur sectiones, & per diametrum
 componantur. Ita demum concinnentur orbes
 duo ad angulos rectos, ut vnus quidem sit in
 compactione totius instrumenti contra eum qui
 est per polos, alter autem contra Eclipticam su-
 matur: sitque punctorum communium, alterius
 quidem per Cancrum, alterius verò per Capricor-
 nũ. Nã per hæc principia, qui per polos est, secat
 Eclipticã. Postea capiendo alterũ, quem struendo
 proportionalem ei qui est per polos, distinguit
 quarta parte à communi sectione circumferen-
 tiam, habetque & reliqui circuli polum, ut E-
 clipticæ, hocque punctum assequitur cylindrium
 excedens introrsum & extrorsum ipsum perfo-
 rando punctum, idque per diametrum, quo etiam
 in illud

in illud æquale & simile assequatur cylindrium.
Et præterea per huiusmodi cylindria duos admit-
tit orbes alios, duobus circulis aliis, alterum qui-
dem forinsecus, ut cōmodo examine sua cauitate
conuexo accommodetur ei qui est per polos, al-
terum verò intrinsecus, ut ad libellam suo con-
uexo ipsius cauitatem accommodet: sitque am-
bobus qui per polos medius. Post autem concin-
nationem quatuor orbium, secat Signiferum in
360 partes, hoc modo ad cōuexam quidē super-
ficiem in dodecatemoria, inscriptis inquam no-
minibus Signorum dodecatemoriis. In profun-
ditate autem ipsius, latera æquo parique modo
dodecatemoriis totam certam habeant crassitu-
dinē, ad intervalla quinq; partiū, dimidiū crassi-
tudinis ad cauā superficiem, ad intervalla partis
vnius: ad dimidiū porro, idque in caua superficie
quoquo versus parte vna. Post id similiter Astro-
labum intus ita concinna, ut orbiculum accom-
modes, alterum tenuem, qui crassitudinem mi-
norem habet, latitudinem verò necessario æqua-
lem Astrolabi latitudini: ut suo conuexo per lon-
gitudinem ac latitudinem accommodans illius
cauitati, ab ipsa comprehendatur moueaturque
sub ipso non excidens illius temporibus. Circū-
actus autem sine impedimento ab illius caua su-
perficie, huic orbiculo binas cōfīctiones per dia-

metrum adiicit æquales, ad rectosque angulos annuētes ad sese inuicem, et ad circuli centrum, & habendo meatus lucis in medio, vt per ipsos fiat aspectus. Quomodo positionem esse conueniat circulorum & meatuum, memorauimus. Cū igitur per duos orbes instrumentum describimus, his utique 5 circulis, quorum est intimus tenuis orbiculus, supra quem per crassitudinem diuisus Astrolabus, & supra hunc Ecliptica, et qui polorum, & supra hunc foris eius qui per polos comparatus affabre Astrolabus. His igitur adiicit ex duobus illis orbibus instrumentū quod diximus, per quod in Boream & Austrum Solis progressus inuenimus, adiicit sumendo per conuexum extra Astrolabum pētedecagoni latus à puncto per quod fabricatum per polos in superficie intermedia & poli Signiferi, & per Cancrum sectionis, & per limitem huius lateris comparans cylindrium rectum. Huicque per diametrum alterum tantum fastigium vtrumque habens quanta sit crassitudo foris Astrolabi: & propterea binos orbes examinatum accommodando dictis quinque orbibus, quò eleuationes capiamus iuxta latitudines Solis & Lune transitus in duobus circulis, vt prius ex quinque circulis instrumentum moueatur, circa Aequinoctialis polos: at bini Astrolabi circa Signiferi po-

ri polos circumaguntur in longitudinem. Fabrica igitur hæc Astrolabi: at vsus huiusmodi.

De vsu Astrolabi.

Rigimus instrumentū in plano Horizonti parallelo, columella videlicet aliqua suffulta in meridiana linea. Si Solis velimus capere distantiam, circumagemus circulum qui per polos est, qui quartam habeat positionem ab extimo ad tantum vsque quantum Signifer sub hoc circumactus obumbretur per totam suam cauam circumferentiam, idque examinatum. Tum enim certum erit in eodem esse plano, vt in instrumento Signifer ad Solis Signiferum habeat: manentēque ipsius positione, proferemus etiam foras Astrolabum quoad ipse fuerit in caua superficie immunis à lumine. Cūque id factum fuerit, hoc est cū pariter orbes obumbrarint per cauas superficies capiēdo ipsorum supra terram sectionem, partēque Signiferi in qua sectio. Secatur nāq; vt iam dictum est, in cōuexa superficie Signifer in partes suas: hæc fatemur Solē obtinere. Cognito autē Sole hoc modo, quot partibus distat, Lunāque existente supra terrā, inueniemus etiam eius distantia intra Astrolabum proferendo, &


tenuem orbiculum, quoad per fixationes quæ sunt in tenui orbiculo, ipsam perspiciamus oculorum altero, conuolvente altero, ne vario aspectu rectitudo perturbetur: ita demum qualis sit Eclipticæ in longitudine qua distat, sectio, facile erit dignoscere ex interiore Astrolabo, & Signiferi facta supra terram sectione, tempore iam dicti aspectus, & quo Eclipticæ partibus distet ad septentrionem aut meridiem ad rectos angulos in circulo Eclipticæ, eadem intra Astrolabum diuisione.

Quanta enim inuenitur distantia à medio Astrolabi puncto, ad mediam lineam communis sectionis Astrolabi & Signiferi, tanta etiam erit Lunæ distantia ad utrasque Eclipticæ partes. Distantia verò Lunæ sumpta interdiu à Sole, poteris rursus per canones partis inuenta, qua distat in signifero noctu Luna, & stellas etiam perspicere tran sferentibus nobis inter unum Astrolabum inquam spectare nos oportet lucescentem stellam. Eodem namque modo quo & Lunæ distantiam à Sole, huiusque ad lunam distantiam possumus inuenire, etiam supra terram non existente Luna ratiocinātibz nobis ex canonibus, quam habeant Signiferi partem apparens Luna stellæque, perfecta fit manifesta ad Lunam ipsius distantia. Ita nanque ipse Ptolemæus in septimo magnæ constructionis mathematicæ, inuenit

uenit cor Leonis per id tempus habens Leonis 2
dimidia partis ab Hipparcho obseruatum in tri-
gesima Cancrī parte, capiēdo quidem interdiu
à Sole Lunæ ad ipsum distantiam : Noctu au-
tem ratiocinando cursum quem fecit medium
duorum aspectuum Lunæ: interdiu inquam vbi
ipsa perspecta est, & noctu vbi in corde Leonis:
atque ita inueniēdo quot partibus ea stella di-
stet à Luna, quam obrinebat perspecta stella: quod
rursus inueniens, collegit quota parte distaret E-
clipticæ, quæ in corde Leonis stella ex distantia
comprehensionis Lunæ.

Hæc denique fabrica, hic est Astrolabi v-
sus: hoc longè accommodatissimum tibi erit
instrumentum ad Lunæ, stellarumque obserua-
tiones, quas non possis nisi per Lunam tenere,
quemadmodum apertissimè ipse docuit Ptole-
mæus.


F I N I S.



GREGORAE

NICEPHORI ASTROLA-

bus, Georgio Valla Placen-
tino interprete.

 *I Astrolabi peritiam tenere volueris, ipsam hoc modo adito. Primum, quærito in quot partibus Solis sit cursus, circulo omni per cæleste corpus ab Astronomis in 360 partes distributo. At hoc pacto inueneris. Dextra manu capiendo Astrolabum, alligato in circulo eius fune, sinistrumque humerum ad Solem conuertendo, siste ad quævis Astrolabum in ea parte ad quam regularum foramen substructili, quod etiam perpendiculum appellatur, colligat cuncta ad superficiem impressas sphaeras, & ubi inscriptæ sunt quadripartij orbis 90 partes: ac cum videris Solis radium forinsecus introrsum ingredientem supernum mediclinij foramen, & è regione oppositum alterum inferius subire, secareq; bifariam omnem impressuram illic rectam lineam obseruato, quotas partes regularij, seu*

mediclinij extremum attingat : ac sicut id inuenis habere, scito ita quoque Solem. Postea si velis scire, sitne meridies, necne, rursus cape sicut instruximus, Astrolabum, sisteq; ad Solem, & considera rursus quotas partes contingat mediclinij extremum, Solisque penetrans foramina radius: eumque scribe numerum, & rursus siste, idque crebro facito, quoad compereris mediclinij extremum peruenire trans quadripartij descriptas partes: cum id videris rediisse in parte vna, scito tum esse meridiem, & traducto quidem Sole, recense partes ab exortiuo Horizonte, declinante ab eo qui ad occasum.

De latitudine climatum, aut tractus alicuius.



Imiliter si velis cognoscere latitudinem vniuscuiusq; climatis, lociue alicuius, cape tibi Astrolabum, sisteq; ad Solem, quemadmodum supra constituimus, quo tempore meridianum incipit Sol secare circulum, aut quo tempore, Arietem aut Libram ingredi incipit: sistitoque quoad inuenies meridiem: quem cum inuenieris, partes orbis annumera, quas Sol præterit, relictasque siste ad climatis, lociue latitudinem.

De horis

De horis diurnis, & exortu ac occasu diei.



Item si nosse velis quota sit diei hora, & quota Signi pars ascendere incipiat Horizontē, necnon quādo occidere incipiat, & quota ad verticē centrū incipiat, et quota eius aduersa, ac è regione opposita: cape tibi Astrolabū, siste ad Solem observando in quotis sit partibus: cūmq; acceperis orbes, & descriptū horas comprehendentem, & loci clima quod cogitas, impressāq; duodecim Signa habētē: exquirito ad quot Signi partes tum Sol sit prouectus: ibique sistito, & deinde pone supra orbē horas continentem, necnon loci clima, orbem ferentem Signa: conuertēq; Solis punctum ad exortuum Horizontem qui est in climatis circulo, traducitōq; partium numerū quem Sol in orbe præterit in climatis circulo iuxta parallellos Horizontis. Postea observato aduersum è regione, Signum in significato puncto Signi, quod (vt prædiximus) præterit: ac ibi comperies quota sit hora. Deinde considera quota hora quo Signo attigit exortuum Horizontem: ac si inuenias sitne septima, an octaua, pluresve, aut pauciores: scito habere ad occasum, & aduersum ipsius Signum.

Itidem obseruato in quot partes secet Signū meridiani centri recta linea, ac ita habere comperies: & è regione aduersum Signum vnum ad centrum noctis mediæ.

De duodecim domorum dominationibus.



Omniū dominatus quos penetrant Signa duodecim, si velis cognoscere quando incipiat penetrare vnumquodque Signū singulas domos, capiēdo Astrolabum, siste contra Solem, & reperiri in quota sit parte ad excellētissimam ab Astronomis secti in 360 partes orbis: inde intueri Horizontem quota Signi alicuius pars hunc contingat: ibique punctum notato: idque conuerte ad octo horarum finem: lineamque considerato quæ mediæ noctis centrum diuidue secet: inueniesque quota pars Signi alicuius incipiat penetrare secundum domus dominatum. Inde conuerte ipsum ad finem decem horarum. Inde porro obseruato mediæ noctis lineam: comperiesque quota pars Signi alicuius incipiat penetrare tertium domus dominatum. Postea, considerato ex aduerso, è regioneque primo Signum contingens horizontem, vbi sit, & partes

tes enumera: & quot in hoc habere inuenies, & aduersum ipsius Signum quod primum dicebamus Horizontem attingere: illicque punctum facito voluêque ipsum ad duarum horarum finem, inspicêque mediæ noctis lineam: inueniêsq; quota pars Signi alicuius inceperit permeare quintum domus dominatum: nam quartus inuenietur quando in quatuor angulis existentes inueniuntur. Itidem voluta eiusmodi punctum ad horarum quatuor finem, inspicêque mediæ noctis lineam, inueniêsq; quota hora aliquod Signum inceperit penetrare sextum domus dominatum: dein traducito quæ his sunt aduersa ad alios domuum dominatus. Sin à linea mediæ noctis non occiderit, inueni exacti Signi partem, quod sit positio domini habentis Signa duodecim, accuratè consideres mediæ noctis rectam lineam, & sicut inueneris illic habere Signum in eius partibus, scito ita habere per lineam mediæ noctis Signum. Itidem si examinatum velis inuenire partem quæ sublimitatem faciat Signi ad Horizontem, an habeat difficultatem, quod non admodum sit indicati loci positio: custodi aduersum eius existēs Signum iuxta occiduum Horizontem: & cuiusmodi illius partem inuenies scito huius esse eiusmodi. At cum vo-

lueris inuenire horæ partem quota sit totius horæ, cape Astrolabum, sistéque ipsum ad Solem inuenitóque in quota hora sit domini diuisi in 360. partes, ibique permaneto, & obseruato aduersum eius Signum, quod tibi indicat horam: facitóque illic punctũ ubi est denticulus habentis orbis duodecim Signa: voluéque punctum aduersum ad horæ principium: rursúque facito punctum ubi pusillus est denticulus: & volue aduersum punctum ad eiusdem horæ finem: & rursus punctũ facito, ubi est denticulus: & considerato quotæ sunt horæ à puncto factó, quod est in horæ principio aduersum ad alterum vsque punctum facti quod est aduersum in fine horæ. Inde porrò considerato quot partes sunt à puncto factó quodcunque fuerit aduersum ad horæ principiu ad primum vsq; factum, cum Sol est in sua sublimitate: deinde considerato quam habeant rationem hæ partes ad omnes partes quas denticulus præterit: ac vt has habere inueneris ad totas partes, scito etiam horæ partem esse, an hæ sint pars dimidia omnium, & illæ dimidiæ: an hæ tertia pars, & illæ pars tertia: ita deinceps.

Ad

Ad scienda partis scrupula.



Quoniam parallelos quoque ad
 quas partes traducimus, quas Sol
 permeat, est cum indagamus, nec
 veritatem satis integre consequi-
 mur: expedit ipsas quoque nosse,
 quò facias ubi oportet punctum in parallelis,
 quod pro Sole capimus. Si est in linea, ecce ha-
 bes integram veritatem, noctique quotæ sint
 horæ: sin extra lineam, velisque nosse ubi po-
 natur punctum quod in signo quod Sol permeat,
 pro ipso ponamus, voluendo punctum ad lineam,
 & fingendo punctum ubi est parvus denticulus
 orbis Signiferi: rursusque voluendo id ad eius
 parallelum, & punctum rursus faciendo ubi
 est denticulus, numera partes impressas, quas
 duo comprehendunt puncta paruuli denticuli: ac
 si sex partes comprehendunt duo paralleli, velisq;
 ponere punctum ad duo, quia duo dimidia sunt sex
 partium: pone etiam ipse denticulum ad 3. dimi-
 diam, partes quas comprehendit: sin dimidium
 ad dimidiam: si 4 dimidia, ad 4 dimidiam: at-
 que ita deinceps.


NICEPHORI

Ad cognoscendum in quo domus dominatu sit Planetes.



Quum autem vis nosse in quoto domus dominatu sit vnusquisq; Planetes à duodecim domuum dominatibus quos inuenisti, considera in quota Signi parte sit Planetes, idque Signum inuenito inter 12 domuum dominatus, inspicéq; an permeet in qua est Planetes: & traducito ipsum intra domus dominatum: si non permeat inducito pone ipsum domus dominatū: sin domus dominatus est, est à principio domus dominatus quoad principium alterius domus dominatus. Cognoscendum hoc quoque tibi est, quod si Planetes est ad partes 5, aut 4, aut minus prope angulum principij, intra ipsum inducitur: sin prope, non inducitur.

De nocturnis horis.





Similiter si nosse velis noctu quota sit hora, & quota pars Signi est ad sublimitatē, cape Astrolabum, siste aut ad stellā quæ nominatur cor Scorpj, aut ad cor Capricorni, aut ad cor Leonis, aut alibi vbi descriptio-

criptiones in Astrolabo : & altero conuiuen-
do oculo appone alterum foramini regularij, vt
videas ex altero stellam è regione positam:
deinde numera in quota parte est ab Hori-
zonte, & illic siste, & quam Signi inueneris
partem secare Horizontem, scito illam facere
exaltationem: hæc ipsa hora est vbi Sol existit.
Horæ autem partem vt inuenias, qua prius
docuimus disciplina, comperies partem horæ
diurnæ: hicque inuenies sublimitatem, velis in-
uenire etiam 12 domuum dominatus, & tradu-
ctiones, & in ipsis vagantes stellas ad sua lo-
ca, sicut prius constituimus.

F I N I S.







Mr/Is/-

